

陶雲汀先生奏疏

奏摺卷二十三目錄

撫蘇稿

安化陶

耆紳重遇鹿鳴摺子

總督會稿

代奏耆紳重遇鹿鳴與宴謝

恩摺子

總督會稿

恭謝

欽頒受俘禮成詩刻摺子

鄉試年老諸生三場完竣循例奏

聞摺子

附清單

訪獲考試撞騙各犯審辦摺子

總督會稿

查明江蘇各屬被水被旱成災分數情形摺子

總督
會稿

籌催回空漕船漫越前進併擬改由橫越閘進

口摺片

請獎高淳縣捐建書院紳董摺子

請將寶蘇局易存錢文搭放兵餉扣回原借本

銀歸款摺子

請分別緩徵江淮等屬舊欠錢糧摺子

總督
會稿

請獎捐輸助賑及收養災民各紳商摺子

籌勘回空漕船改由大江至丹徒橫閘試行入

口摺子

查明災區來春應請接濟摺子

總督會稿

奏請借款挑濟劉河摺子

總督會稿

附奏回空漕船改由橫閘進口全竣摺片

御賜福字暨鹿肉鹿腿謝

恩摺子

耆紳潘奕雋會榜重逢請與

恩榮筵宴摺子

總督會稿

耆紳重遇鹿鳴摺子

總督會稿


奏爲耆紳重遇鹿鳴懇

恩與宴以昭

盛典仰祈

聖鑒事竊據江蘇布政司梁章鉅詳稱原任兩廣總督緣事革職嗣補兵部武選司主事吳熊光江蘇昭文縣人現年七十九歲於乾隆三十三年由附貢生中式戊子科順天鄉試舉人壬辰科會試挑取中正榜引

見以內閣中書用在軍機章京上行走洊陞通政司叅



議嘉慶二年

恩加三品卿銜在軍機大臣上行走補放直隸布政使
擢授河南巡撫湖廣總督八年三省教匪平定
賞太子少保銜調任直隸總督旋調兩廣總督十三年
因嘆咭喇兵船進口辦理不甚妥協革職發往
伊犁效力十五年蒙

恩釋回奉

特旨以六部主事用補授兵部武選司主事請假旋里
修塋嗣因患病在籍調理今屆道光八年戊子
科鄉試距該員中式舉人之年正值花甲一週

與重宴鹿鳴之例相符懇請就近在本省與宴
等情詳請具

奏前來臣等查吳熊光自弱冠登科之後久依
禁近歷任封圻嗣以獲咎因公復又邀

恩錄用此時耆齡在籍適當蕊榜重逢自應就近與宴

鹿鳴以耀科名而彰人瑞除咨明禮部外臣等

謹會同江蘇學政臣朱方增合詞恭摺具

奏伏乞

皇上聖鑒謹

奏

道光八年六月十三日會

奏七月十三日奉到

硃批另有旨欽此同日奉到道光八年六月二十八日內閣奉

上諭蔣攸銛等奏耆紳重遇鹿鳴懇與筵宴一摺原任兵部主事吳熊光曾任督撫大員雖於兩廣總督任內獲咎事尚因公此時養病在籍年近八旬適當蕊榜重逢洵屬藝林嘉瑞吳熊光著加恩賞給四品卿銜准其重赴鹿鳴筵宴以昭盛典欽此

代奏耆紳重遇鹿鳴與宴謝

恩摺子

總督會稿

奏爲據情代奏恭謝

天恩仰祈

聖鑒事竊照江蘇昭文縣耆紳吳熊光本年戊子科

重遇鹿鳴經

臣

等恭摺

奏懇與宴欽奉

上諭蔣攸銛等奏耆紳重遇鹿鳴懇與筵宴一摺原任兵部主事吳熊光曾任督撫大員雖於兩廣總督任內獲咎事尙因公此時養病在籍年近八旬

適當蕊榜重逢詢屬藝林嘉瑞吳熊光著加恩賞
給四品卿銜准其重赴鹿鳴筵宴以昭盛典欽此
當卽恭錄轉行欽遵茲據四品卿銜吳熊光遣
屬呈稱熊光跪讀

恩旨感激涕零伏念熊光江左單寒至愚極陋由乾
隆戊子科舉人考取壬辰中正榜以候補內閣
中書挑在軍機章京上行走仰蒙

高宗純皇帝

仁宗睿皇帝不次擢用嘉慶十三年在兩廣總督任內
因喚咭喇兵船進口辦理不善革職發往伊犁

効力在戌未滿一年卽蒙

降旨釋回以六部主事用選補兵部武選司主事行走
兩載嘉慶十八年緣常熟祖塋坍塌無人承修
在部具呈請假轉咨吏部具奏奉

旨允准回籍修理完竣十九年假滿正在請咨赴補因
病呈請轉咨吏部展假調理無如氣血兩虧忽
愈忽發涓埃未報惶悚方深茲又蒙

恩以 熊光 於兩廣總督任內獲咎事屬因公

賞給四品卿銜准與鹿鳴筵宴凡此

三朝恩遇均爲夢想所難期舉家銘感挾髓淪肌除恭

設香案望

闕叩頭並俟鄉闈揭曉時扶病由水路赴省恭襄盛典隨衆行禮外所有感激下忱懇請代奏等情據此理合據情恭摺具

奏伏乞

皇上聖鑒謹

奏

道光八年八月三十日具

奏十月初四日奉到

硃批知道了欽此

恭謝

欽頒受俘禮成詩刻摺子

奏爲恭謝

天恩仰祈

聖鑒事頃由摺弁賞奉

御書受俘禮成詩刻

頒賞到臣謹卽恭設香案望

闕叩頭祇領跪誦之下欣忭難名欽惟

皇上勲猷省定

聲教覃敷

抒遠略以揚威龍堆萬里應清鑣而入吹鳧藻三軍
惟

九重以保大定功斯薄海慶止戈爲武銀河洗雨全
歸瀚海之師金鐙敲風生繫樓蘭之頸儀成授
馘憤泄同仇有成功必有文章

堯天巍煥告禮明亦告樂備

舜陞賡颺玉振金聲

宸咏發鈞天之響星輝雲潤

璿臺垂寶壘之光夫以鐵勒來庭調翻驚曲燕然勒
石跡補狼居鬼方深入以三年獫狁徂征於六

月猶煩作頌每見陳詩矧夫馳到紅旗自禹貢
析支渠搜而外牽來白組廣周庭每牛雖馬之
圖擒頡利於行閒不詡秦王破陣縛兜題於馬
上長歌壯士入關凡茲迅奏之

膚功悉本如神之

勝算

御樓俯視知此虜早在目中

天藻親揮以大義布告天下覆昏暴乃以同遠通款
聖人戢武之慮長恢

舊服卽以煥新猷仰

盛世

觀文之化治 徵臣 獲瞻

奎什敬睹

瓊鑄景

聖製之高深洵遠軼於酌桓般賚繹

淵懷之虔輦彌用惕乎疏附後先十二宮十二侯誦

十二韻於爍之

鴻篇風宣凱樂億萬里億萬民祝億萬年無疆之

駿業慶普洪延所有 臣 感幸欣忭下忱謹繕摺恭謝

天恩伏乞

皇上聖鑒謹

奏

道光八年九月二十八日具

奏十一月初八日奉到

硃批知道了欽此

鄉試年老諸生三場完竣循例奏

聞摺子

附清單

奏爲鄉試年老諸生三場完竣查明年歲符合循
例恭摺具

奏仰祈

聖鑒事本年戊子科江南文闈鄉試欽奉

諭旨著

臣監臨遵卽入闈辦理場務准江蘇學政

臣

朱方增安徽學政

臣

汪守和各將應試年老諸

生造冊咨送前來

臣

於點名之際卽經留心察

看均屬高年矍鑠踴躍觀光揭曉後查得該年

老諸生三場完竣未經中式者除前奉

恩賞副榜此次仍在八十以上照例毋庸計算外內
有江蘇省年屆九十之副榜吳振清八十以上
之附生王守介歲貢生臧雲衢廩貢生張錫璠
附生嵇岷桂王治陶恩光仇絕塵等八名安徽
省年登九十以上之副貢生唐焄鄭國光八十
以上之附生曹維城陳清鄭緒榮周全謝清德
孫憲金瑜查德坊沈興增生胡玉燭汪竹書等
十三名臣查閱試卷文理尙屬明順合計江蘇
安徽兩省年老諸生共二十一名飭據江寧藩

司賀長齡會同提調鹽巡道葆謙查明該老生等年歲及入學年分均屬相符詳請具

奏臣查該老生等志矢青年經窮皓首渥被菁莪之

雅化氣且勿衰培成蓀桂之餘馨老當益壯宜沐恩榮於

聖世允昭盛燬於儒林謹會同大學士兩江總督臣

蔣攸銑安徽巡撫臣鄧廷楨恭摺具

奏並開列清單敬呈

御覽伏乞

皇上聖鑒敕部核覆施行謹

奏

謹將江蘇安徽兩省戊子科鄉試八十九十以
上三場完竣諸生開列名單敬呈

御覽

計開

江蘇省九十以上老生一名

吳振清睢寧縣學副榜實年九十歲嘉慶二
十四年

欽賜副榜

江蘇省八十以上老生七名

王守介宿遷縣學附生實年八十七歲

臧雲衢桃源縣學歲貢生實年八十二歲

張錫璠桃源縣學廩貢生實年八十二歲

嵇岷桂宜興縣學附生實年八十二歲

王治甘泉縣學附生實年八十二歲

陶恩光鎮江府學附生實年八十歲

仇絕塵鹽城縣學附生實年八十歲

安徽省九十以上老生二名

唐焄巢縣學副貢生實年九十一歲嘉慶

十八年

欽賜副榜

鄭國光涇縣學副貢生實年九十一歲道
光二年

欽賜副榜

安徽省八十以上老生十一名

曹維城池州府學附生實年八十三歲

陳清池州府學附生實年八十三歲

鄭緒榮青陽縣學附生實年八十三歲

周全池州府學附生實年八十二歲

謝清德宿州學附生實年八十二歲

孫 憲青陽縣學附生實年八十二歲

金 瑜當塗縣學附生實年八十二歲

查德坊涇縣學附生實年八十一歲

沈 興池州府學附生實年八十一歲

胡玉燭績溪縣學增生實年八十一歲

汪竹書歙縣學增生實年八十歲

道光八年九月二十八日具

奏十一月初八日奉到

硃批禮部議奏單併發欽此

道光八年十一月十二日奉

上諭本年戊子科鄉試據各省陸續將年老諸生開單具奏當交禮部查覆茲據禮部將順天等省年老諸生查明覆奏該生等年臻耄耄踴躍觀光榜發未經中式宜沛恩施以酬其皓首窮經之志所有江蘇省年屆九十之副貢生吳振清安徽省九十以上之副貢生唐焄鄭國光江蘇省八十以上之歲貢生臧雲衢俱著加恩賞給舉人准其一體會試江蘇省八十以上之附生王守介廩生張錫璠附生嵇屺桂王治平年屆八十之附生陶恩光

仇絕塵安徽省八十以上之附生曹維城陳清鄭
緒榮周全謝清德孫憲金瑜查德沈興增生胡玉
燭年屆八十之增生汪竹書俱著加恩賞給副榜
用示朕嘉惠耆儒至意欽此

訪獲考試撞騙各犯審辦摺子

總督會稿

奏爲訪獲撞騙得贓各犯審明定擬仰祈

聖鑒事案據前署松江府知府王有慶等具稟本年
三月學院考試松郡嚴查各項招搖匪徒屢諭
該府等設法查拏二十四日據委充巡捕官章
恩榮而稟城外廣幅地方訪有外來棍徒向考
試童生騙銀情事比卽派委府經歷張慶瑗等
帶同縣役跟踪密緝至青浦境內會同該縣拏
獲田泳年等六名究出餘黨又獲陳北恩等八
名先後解郡當據被騙童生李驤赴府投首提

訊各供係聽從逆犯陳幅誑騙得贓等情接准
學臣朱方增咨稱此案業於考試情形摺內

奏明移咨交臣等提省究辦奉到

硃批知道了欽此當經轉飭該府等確審詳解一面

嚴緝逸犯陳幅等務獲併究旋又准學臣於江

寧錄科時訪得首犯陳幅及盧光輝在彼潛匿

飭縣拏解歸案審辦由臬司衍慶會同蘇州藩

司梁章鉅審擬解勘前來臣蔣攸銛遠在清江

不及會審臣陶澍監臨事竣回蘇隨親提各犯

悉心研鞫緣陳幅籍隸安徽休寧縣易泳春籍

隸湖北漢陽縣田泳年原籍江寧寄居陽湖縣
陶斯馨籍隸浙江仁和縣俞昭籍隸上元縣道
光八年二月間陳幅等在蘇州傭趁謀食先後
會遇各道貧難陳幅起意乘學政考試松江設
法向考童撞騙邀令易泳春等相幫得錢分用
各犯允從陳幅又糾約續獲之湖北咸寧人盧
光輝及在逃之馬一賽大入夥田泳年賣筆生
理陳幅令其先赴松江遇有童生相機誘說約
定三月十八日在松郡城外廣幅地方會齊時
有現獲之湖北人許卜榮陳映桂江寧人陳北

恩及姪陳雲九四川人王濤山陽縣人衛奎併其子衛惲均在蘇營生各與陳幅熟識陳幅邀允同行照應許俟撞得錢文酌量酬勞三月初十日田泳年至華亭縣文童李驤家賣筆詢知李驤應考卽捏稱伊有親戚戴姓係江西九江人曾爲前任辛學院幕友閱看文字辛學院故後經辛少爺薦在現任朱學院處閱文如欲進學可以用銀買取李驤聽信約俟到城時再商是月十八日陳幅與易泳春等坐船抵松在廣幅一帶停泊田泳年往告前情陳幅囑其探聽

李驤信息一面遣令盧光輝俞昭陶斯馨上岸
招誘應考童生未經招得二十一日田泳年探
知李驤到城向陳幅通信隨畱許卜榮陳北恩
陳雲九王壽陳映桂衛奎衛憫在各船照管陳
幅與易泳春陶斯馨盧光輝俞昭馬一賽大上
岸找尋空廟一所因易泳春係湖北人與江西
口音相近囑令冒充戴姓幕友之弟易泳春允
從陳幅又令馬一賽大扮作跟人自與俞昭陶
斯馨盧光輝在廟外招接田泳年進城將李驤
誘領至廟與易泳春會面易泳春用言哄騙允

在場內照應說定洋銀四百圓包許入學須先
付洋銀二百五十圓餘俟出案找足易泳春又
假意囑令李驤於出場後將坐號告知田泳年
傳入內署以便從中關照李驤希圖倖進信以
爲實因未帶洋銀當同陶斯馨盧光輝至寓如
數交給陶斯馨等攜得洋銀回船陳幅分給易
泳春田泳年俞昭陶斯馨盧光輝馬一賽大名
二十圓許卜榮陳北恩陳雲九王濤陳映桂衛
奎衛惘各四圓其餘抵充盤費日用俞昭所分
洋銀仍交陳幅收存當被趁船赴松之武生周

元賓及方安全許南山蔡淋知覺查問陳幅各分給錢五百文囑勿聲張二十二日陳幅攜帶行李乘間潛逃俞昭復向易泳春等索分未遂捏情赴府稟控先經委員訪聞稟府飭拏易泳春等聞信逃入青浦境內被獲解郡李驤亦聞拏投首惟首犯陳幅等逃逸旋亦就獲提省先後屢審據各供認前情不諱詰無另犯不法別情查學政辛從益朱方增兩任內閱文幕友均無戴姓其人陳幅令易泳春假充時原係混捏李驤何以遽肯見信給與洋銀恐陳幅等尙有

夥黨另行設法誘騙致墮其術復向各犯層層究詰據李驤供稱朱學院關防嚴緊幕友何人本無從探悉且易泳春冒充江西人與前任辛學院籍貫相同口音又屬相似是以深信不疑並無別故至當日接談時止有陳幅等數人未見他夥質之陳幅等堅稱該犯等係輾轉供扳始行破獲實已盡數供出如另有同夥何肯匿不供吐自任重罪等語反覆究詰各供不移案無遁飾查例載生童考試如有積慣棍徒捏稱給與字眼記認誑騙財物者枷號三個月發煙

瘴地面充軍被騙生童杖一百徒三年又聞拏
投首之犯於本罪上減一等科斷又律載爲從
減一等又一家人共犯止坐尊長各等語此案
陳幅糾同易泳春等冒充幕友捏情向文童李
驤誣騙得受多贓殊屬不法應按例問擬陳幅
合依生童考試如有積慣棍徒捏稱給與字眼
記認誣騙財物者枷號充軍例先枷號三個月
發煙瘴地方充軍至配所杖一百折責安置易
泳春田泳年陶斯馨盧光輝俞昭聽從陳幅同
場誘騙均屬爲從卽俞昭赴府呈控由於分贓

不遂所致並非出自悔罪與自首不同應一律
科罪易泳春等五犯俱依爲從律減一等各杖
一百徒三年許卜榮陳北恩王濤陳映桂衛奎
訊止相幫照應並未到場誑騙情節較輕應於
易泳春等徒罪上再減一等各杖九十徒二年
半李騷希圖倖進致被哄騙應依被騙生童杖
一百徒三年例該犯聞拏投首照例減一等杖
九十徒二年半田泳年王濤據供親老丁單飭
關各原籍查取供結另行核辦餘犯分別定地
折責充徒衛惻係衛奎之子陳雲九係陳北恩

之姪雖已入夥業經罪坐尊長應照律免議飭
令遞籍交保管束周元賓方安全許南山蔡淋
訊非同夥惟於事後知情分贓均屬不合應照
不應重律各杖八十方安全年逾七十照律收
贖周元賓武生咨明學政斥革與許南山等各
折責發落該犯等分得各贓照追入官充公逸
犯馬一賽大飭緝獲日另結此案匪徒入境撞
騙卽經該府縣訪獲究辦失察職名應免開報
除供招咨部查核外謹將審擬緣由合詞恭摺
具

奏伏乞

皇上聖鑒謹

奏

道光八年九月二十九日具

奏十一月初八日奉到

硃批刑部議奏欽此

查明江蘇各屬被水被旱成災分數情形摺子

總督
會稿

奏爲查明江蘇省各州廳縣衛被水被旱成災分
數及收成歉薄情形循例由驛具

奏恭懇

聖恩分別給賑蠲緩賞給口糧以普

皇仁仰祈

聖鑒事竊照本年江蘇省江寧淮安揚州徐州海州
等各府州屬或因雨澤愆期高田受旱或因雨
澤過多山水壩水下注田地被淹均飭委員確

勘節經臣陶澍於六七八等月雨水田禾情形摺內奏

開在案嗣據句容縣稟報被旱山田續得雨澤毋庸勘辦惟請緩徵舊欠錢糧應卽剔除另行查辦此外被災各屬飭催兩藩司暨各府州速卽查勘由司覆核詳辦去後茲據江寧布政使賀長齡詳稱因辦理文武鄉場不克分身親勘詳委淮揚淮海徐州三道分赴災重之區覆加查勘據各委員會同各州縣衛勘覆核計淮安府屬之山陽桃源揚州府屬之高郵寶應徐州府屬

之沛縣海州并所屬之沐陽及淮安大河等九州縣衛被淹較重成災八分七分五分並勘不成災不等又江寧府屬之六合淮安府屬之阜寧清河安東鹽城揚州府屬之泰州東臺江都甘泉興化徐州府屬之銅山豐縣蕭縣碭山邳州宿遷睢寧海州屬之贛榆及徐州衛等十九州縣衛均係收成歉薄勘不成災照例分別給賑蠲緩請給口糧又據蘇州布政使梁章鉅詳稱松江府屬之華亭奉賢上海南匯川沙等五廳縣太倉州及所屬之鎮洋縣併鎮海衛均因

秋後久晴嗣又連遇風雨收成稍減請將原遞
緩道光六年初二限三年二三限各銀米遞緩
徵輸各等情詳請具

奏前來臣等伏查江藩司所屬之江寧淮安揚州
徐州海州等府州屬被水被旱情形已據道府
州縣印委各員查勘明確所有成災八分七分
之海州沐陽大河等三州縣衛被災較重小民
生計維艱相應恭懇

皇上天恩俯准按照成災分數查明極次貧民戶口
分別給賑貧生兵屬飢軍一律查辦概以折色

散放海州沐陽山陽桃源高郵寶應沛縣淮安
大河等州縣衛成災八分七分五分田地應徵
道光八年地丁漕糧漕項銀米均按分蠲免蠲
剩銀米照例分別帶徵所有成災各屬內勘不
成災之區同六合阜寧清河安東鹽城泰州東
臺江都甘泉興化銅山豐縣蕭縣碭山邳州宿
遷睢寧贛榆徐州等州縣衛勘不成災田地應
徵道光八年地漕各項銀米均請緩至來年秋
成後分作二年帶徵又淮揚等屬減則田地並
懇

聖恩准循歷屆成案准其一律緩徵其山陽高郵寶應沛縣之成災五分桃源縣之成災五分及勘不成災並清河安東二縣勘不成災之情形較重各鄉莊均係連年積歉之區戶鮮蓋藏民情拮据誠恐隆冬沍寒之際口食無資合無仰懇聖主格外恩施將山陽高郵寶應沛縣之成災五分桃源縣之成災五分及勘不成災並清河安東二縣勘不成災之情形較重各鄉莊乏食貧民於今冬

賞給一月口糧以資接濟淮安大河兩衛坐落各該

縣鄉莊卽隨各該縣一律辦理其餘成災及勘不成災各屬無力貧民軍丁應否酌請口糧或酌借籽種等項俟來春察看情形分別辦理其各災屬所需賑濟口糧銀兩俟查明另行

奏請撥用其海州併沐陽縣一水一麥減則田地應請照案一體緩徵如有應需照例給賑之處飭令確切查辦各州縣蘆課學租河灘場租攤徵河銀出借籽種口糧新墾地畝蘆葦牧馬各草場復賦籌餉等款並抄案入官地畝錯雜民田之內俱照坐落地方一律分別查辦鹽場竈

地歸鹽務衙門查辦所有成災及勘不成災田地應徵已丑年新賦並請緩至該年秋成後啟徵其未完嘉慶二十三年起至道光二年舊欠地漕等項銀米麥豆因係頻年積歉之區業經前督撫

臣

奏請自道光三年四年秋成後起各就最遠年分帶徵一年欽奉

諭旨允准上年秋後應徵三四五六各年熟田及分徵最遠一年錢糧又因民力未逮復經

奏准緩至本年秋後分別啟徵各在案本年復被

災歉民力拮据請將分徵案內應帶最遠一年
及已啟徵未完並道光三四五六七等年災熟
錢糧凡坐落本年災區一併緩至來年秋後分
別啟徵所有本年熟田應行帶徵最遠一年並
道光三四五六七等年舊欠錢糧本應按限啟
徵惟現據各州縣以頻年積歉民力維艱詳請
遞緩現經臣等飭司轉飭該管府州體察民情
覆加確核由司彙核詳辦俟詳到另行專案具
奏又查賑員役薪水飯食等項例於抄案銀內動
撥毋庸動支耗羨設有不敷另行

奏咨覆准支給統俟事竣造冊報銷再查阜寧清河桃源宿遷海州沐陽贛榆等七州縣漕糧向例民折官辦本年各該州縣均係被災應請查照嘉慶十五年秋災情形案內

奏准章程將災田米麥緩俟成熟之年再行採辦熟田米麥分別辦運所有應緩漕價各數統於奏銷案內照數登報又蘇藩司所屬華亭奉賢上海南匯川沙太倉鎮洋併鎮海衛等八州廳縣衛亦據查明秋收稍有減色情形較輕惟自道光三年重災以後六七兩年又叠遇減收民間

元氣未能全復今復收成減薄若將新舊銀米責令同時並納民力實有不逮除該州廳縣衛本年銀米仍令照常徵輸外仰懇

聖恩將華亭奉賢上海南匯川沙等五廳縣應徵原遞緩道光六年初限災緩銀米均遞緩至道光九年秋後啟徵其二限銀米遞緩至十年秋後啟徵太倉鎮洋二州縣併鎮海衛原遞緩道光三年二限銀米均遞緩至九年秋後啟徵三限銀米遞緩至十年秋後啟徵以紓民力其餘舊欠及此外各屬應徵新舊銀米仍行照常徵輸

除將江淮等屬災歉蠲緩情形另行恭疏

題報併飭將應蠲應緩確數核實造冊咨部其松
太二屬遞緩銀米亦飭查明確數造冊咨部外
所有臣等查明分別辦理緣由謹合詞恭摺循
例由驛具

奏伏乞

皇上聖鑒訓示謹

奏

道光八年十月初九日由驛具

奏十月二十八日奉到

硃批另有旨欽此又同日奉到道光八年十月十九

日內閣奉

上諭蔣攸銛等奏查明各州廳縣衛被水被旱成災
分數及收成歉薄情形請分別給賑蠲緩賞給口
糧一摺本年江蘇省江寧淮安揚州徐州海州等
各府州屬或因雨澤愆期高田受旱或因山水壩
水下注田地被淹據該督等查明屬實懇請恩施
著照所請成災八分七分之海州沭陽大河等之
州縣衛准其按照成災分數查明極次貧民戶口
分別給賑貧生兵屬飢軍一律查辦概以折色散

放海州沐陽山陽桃源高郵寶應沛縣淮安大河
等州縣衛成災八分七分五分田地應徵道光八
年地丁漕糧漕項銀米均著按分蠲免蠲剩銀米
分別帶徵所有成災各屬內勘不成災之區同六
台阜寧清河安東鹽城泰州東臺江都甘泉興化
銅山豐縣蕭縣碭山邳州宿遷睢寧贛榆徐州等
州縣衛勘不成災田地應徵道光八年地漕各項
銀米均著緩至來年秋成後分作二年帶徵又淮
揚等屬減則田地並准一律緩徵其山陽高郵寶
應沛縣之成災五分桃源縣之成災五分及勘不

成災並清河安東二縣勘不成災之情形較重各鄉莊乏食貧民著於今冬賞給一月口糧以資接濟淮安大河兩衛坐落各該縣鄉莊卽隨各該縣一律辦理其海州併沐陽縣一水一麥減則田地著一體緩徵如有應需照例給賑之處著確切查辦各州縣蘆課學租河灘場租攤徵河銀出借籽種口糧新墾地畝蘆葦牧馬各草場復賦籌餉等款並抄案入官地畝錯雜民田之內俱照坐落地方一律分別查辦鹽場竈地應歸鹽務衙門查辦所有成災及勘不成災田地應徵己丑年新賦並

著緩至該年秋成後啟徵其未完嘉慶二十三年起至道光二年舊欠地漕等項銀米麥豆前經奏准自道光三年四年秋成後起各就最遠年分帶徵一年上年秋後應徵三四五六各年熟田及分徵最遠一年錢糧又因民力未逮奏准緩至本年秋後分別啟徵本年復被災歉民力拮据著將分徵案內應帶最遠一年及已啟徵未完並道光三四五六七等年災熟錢糧凡坐落本年災區一併緩至來年秋後分別啟徵至阜寧清河桃源宿遷海州沐陽贛榆等七州縣漕糧向例民折官辦本

年各該州縣均係被災准其查照嘉慶十五年秋災情形案內奏准章程將災田米麥緩俟成熟之年再行採辦熟田米麥分別辦運所有華亭奉賢上海南匯川沙太倉鎮洋並鎮海衛等八州廳縣衛秋收稍減情形較輕惟連年疊遇減收民間元氣未復若將新舊銀米同時並納民力實有不逮除該州廳縣衛本年銀米仍令照常徵輸外其華亭奉賢上海南匯川沙等五廳縣應徵原遞緩道光六年初限災緩銀米均著遞緩至道光九年秋後啟徵其二限銀米遞緩至十年秋後啟徵太倉

鎮洋二州縣並鎮海衛原遞緩道光三年二限銀
米均准遞緩至九年秋後啟徵三限銀米遞緩至
十年秋後啟徵其餘舊欠及此外各屬應徵新舊
銀米仍行照常徵輸餘俱照所議辦理該部知道
欽此

籌催回空漕船漫越前進併擬改由橫越閘進
口摺片

再查丹徒運河自入冬以來江潮微弱且因連
遇西風底水刷耗以致回空幫船行走維艱經
臣疊飭常鎮道暨鎮江府丹徒縣設法甯撈實
力催僨併又派委將備前赴瓜洲揚州一帶會
同該處地方文武督押幫船將所帶貨物盡數
起卸以期船身輕便行走迅速茲截至十月二
十二日止蘇省幫船共已進口一千六百三十
六隻尚有松江幫船三百餘隻浙省各幫軍船

九百六十餘隻均未渡江進口現值小汛連日
西風刮刷河水益形淺涸如此時卽行煞壩挑
河則後船尙多必致有悞歸次查浙省幫船歸
次程途較松江幫船爲遠似應先提浙船進口
以便早行歸次現經是臣咨商漕臣飭令浙江各

幫漫越松江幫船之前渡江以便於十一月初
旬江湖大汛期內催令進口南下其松江幫船
爲數究屬有限仍當陸續趕催如果大汛以後
尙不能全行進口或改由橫越二閘進口或在
壩外守待先行挑河俟開壩首先進口南下臨

時察看情形再行酌辦庶漕務挑工兩無貽悞
理合附片具陳伏乞

聖鑒謹

奏

道光八年十月二十九日具

奏十二月初六日奉到

硃批知道了欽此

請獎高淳縣捐建書院紳董摺子

奏爲高淳縣紳士捐建書院懇請

聖恩分別議敘以示獎勵事據江寧布政使賀長齡
詳稱據高淳縣知縣許心源先後詳稟高淳舊
有書院建自前明迄今二百餘年久已頽廢該
縣到任後查有尊經閣一處坐落縣學之後基
址寬大房屋整齊修葺擴充可以作爲書院惟
掌教束修諸生膏火及修理房舍置備器具等
項所費頗多當經邀集儒學及巡檢典史各員
公同籌議倡首捐廉設法勸諭各紳士等俱極

歡欣鼓舞踴躍捐輸就所捐田畝及錢文合計
共捐錢二萬三千餘串現將應辦事宜次第辦
竣高淳地係彈丸富戶本少外縣商鋪寄居營
趁者又不便向其捐勸今於兩月有餘本邑官
民捐錢至二萬三千餘串書院計日告成固屬
紳士樂善捐輸亦由董事經理妥協詳請分別
獎勵等情由該藩司核明除儒學教官巡檢典
史各員由外記功三百兩以下各捐戶另行造
冊在外請獎外請將三百兩以上各捐戶及勸
捐經理最爲出力各董事

奏請獎敘併聲明該縣知縣許心源首先倡捐制
錢一千串勸諭捐錢至二萬餘串得以速成善
舉請一併議敘以示鼓勵等情前來臣查書院
爲教育人才之地全在地方官隨時整頓高淳
縣書院久已頽廢生童肄業無所於培植人才
殊有關繫茲經該縣許心源捐廉首倡各紳士
踴躍捐輸兩月有餘捐錢二萬三千餘串速成
善舉洵屬可嘉查定例凡士民人等捐修公所
實於地方有裨益者由督撫具

題捐銀至千兩以上請

旨建坊不及千兩者交地方官給匾如有應行

旌表而情願議敘者由吏部核議等因今據高淳縣知縣許心源將捐輸各紳士造冊請獎由江寧藩司核明轉詳請

奏前來所有高淳縣捐銀二千兩以上之議敘縣丞職銜邢士昕一千兩以上之捐納布政司理問職銜邢邦達文童唐向榮又三百兩至五百兩以上之捐職布政司經歷谷鳳鳴捐納布政司理問職銜邢春華吳欽捐封職員吳位升貢生俞銑增生陳郁文附生陳殿勲監生陶仁邢

鐸李有羣文童唐壽泰陳功俊王錦礪孔廣趨
民人韓懷興及勸捐出力之董事歲貢生孔廣
業監生李培基田馨仰懇

聖恩俯准交部分別議敘再高淳縣知縣許心源淳
明篤實於地方公事極力整飭頗得民心今因
書院久廢首先倡捐千金勸諭紳士於三月之
內捐錢至二萬餘串得以刻期修復卽行開課
辦理甚爲妥速並懇

聖恩交部議敘以示鼓勵除將各紳士履歷清冊咨
部外謹會同大學士兩江總督臣蔣攸銑江蘇

學政 臣 申啟賢合詞恭摺具

奏伏乞

皇上聖鑒

訓示施行謹

奏

道光八年十月二十九日具

奏十二月初六日奉到

硃批吏部議奏另有旨欽此同日奉到道光八年十一月十六日內閣奉

上諭陶澍奏高淳縣紳士捐建書院請分別議敘一

摺江蘇高淳縣書院久已頽廢經該縣知縣首先倡捐並勸諭紳士於三月之內捐輸修復據該撫查明懇子恩施著照所請高淳縣知縣許心源著加恩交部議敘其捐銀二千兩以上之議敘縣丞職銜邢士昕一千兩以上之捐納布政司理問職銜邢邦達文童唐向榮三百兩至五百兩以上之捐職布政司經歷谷鳳鳴捐納布政司理問職銜邢春華吳欽捐封職員吳位升貢生俞鋒增生陳郁文附生陳殿勲監生陶仁邢鐸李有羣文童唐壽泰陳功俊王錦礪孔廣趙民人韓懷興及勸捐

出力之董事歲貢生孔廣業監生李培基田馨著
吏部議奏分別議敘欽此

請將寶蘇局易存錢文搭放兵餉扣回原借本銀歸款摺子

奏爲原借銅鉛工本銀兩易存錢文請搭放兵餉卽將扣回錢本歸還借款以資便速仰祈

聖鑒事竊

臣

前同督

臣

因蘇城銀價昂貴錢價過賤

奏請暫借司庫銅鉛工本銀二十萬兩易換錢文以平銀價俟價平時易銀還款並聲明隨時察看如借撥銀兩尙未發完銀價已平卽行停止
欽奉

諭旨允准欽遵轉行在案茲據蘇州布政使梁章鉅

江蘇按察使衍慶轉據蘇州府陳鑾寶蘇局監督蘇州府同知范博文會詳前據長洲元和吳縣赴司領銀九萬兩按照時價每兩易錢一千二百八十文計易錢一十一萬五千二百串除每串給發麻串水腳錢二文共錢二百三十千四百文外淨該錢一十一萬四千九百六十九串六百文已照數解赴寶蘇局庫存貯嗣據該三縣呈報發換銀兩以來市肆銀價漸平察看自六月下旬至九月下旬每庫平紋銀一兩皆易錢一千二百七十五文較前少減所有未領

銀十一萬兩似可停止發換所有換存錢文應照原奏仍行易銀解司歸款惟目下蘇城銀價較前發換時每串僅減五文若遽易銀歸款誠恐銀價復昂商民不便請卽以前項錢文搭放兵餉等情由該司等查明江寧蘇州各標營每月應支餉錢六千餘串寶蘇局原存鼓鑄錢文除已將江寧道光九年春夏季餉錢一萬九千串先期移解外截至現今止尙存錢三千三百餘串內應抵支蘇州各營未領冬季餉錢一千四百六十餘串實應存局鼓鑄錢一千八百餘

串若同現在易存錢文一併接續搭放江寧蘇州兵餉堪以放至十年秋餉爲止又查定例搭放兵餉每錢一千應扣回錢本銀一兩以易存錢一十一萬四千九百六十九串六百文搭放兵餉卽可收回錢本銀一十一萬四千九百六十九兩六錢除歸還原領銀九萬兩外計有盈餘銀二萬四千九百六十九兩六錢應一併歸入錢價項下以資採買銅鉛工本之用一轉移間在市肆銀價不致復昂而歸還原領銀兩亦屬有盈無絀至蘇局旣請以易存錢文搭放兵

餉本年毋庸開爐鼓鑄俟來春察看市價情形
再行議詳等情請

奏前來臣查暫撥庫款易換錢文原爲藉平銀價
茲銀價稍減錢價稍增自應照依原

奏將未發銀十一萬兩卽行停止其已發銀九萬
兩易存錢文仍應易銀歸款惟較前發換時銀
價每兩僅減錢五文若遽易回銀兩誠恐銀價
復昂且輾轉易換未免需時如卽以現在易存
錢文搭放兵餉核計收回錢本銀兩於歸還原
款銀九萬兩尙屬有盈無絀且較爲便速一舉

兩得其蘇局鼓鑄俟來春察看市價情形再行
酌辦是否有當謹會同大學士兩江總督臣蔣
攸銑合詞恭摺具

奏伏乞

皇上聖鑒訓示謹

奏

道光八年十月二十九日具

奏十二月初六日奉到

硃批依議欽此

請分別緩徵江淮等屬舊欠錢糧摺子

總督會稿

奏爲查明江淮等屬熟田節年舊欠錢糧未能同時並納恭懇

聖恩分別緩徵以紓民力事竊照江寧淮安揚州徐州海州五屬節年舊欠錢糧前於道光四年因民力拮据將二年以前錢漕分年緩帶嗣復連年災歉又於道光七年將道光三年以後積欠錢漕分別災熟

奏准緩至本年秋後分別啓徵今本年淮揚徐海等屬秋被水災江寧府屬亦間有受旱除災歉

之區應帶舊欠業於秋災情形案內

奏請緩徵欽奉

恩旨允准其成熟田地節年舊欠錢糧亦於前摺聲
明另行專案具

奏在案茲據江寧布政使賀長齡飭據該管府州
各就所屬地方體察情形分別應徵應緩詳請
具

奏前來臣等伏查本年江淮揚徐海各屬成熟田
地非係毘連今歲災區卽屬連年積歉若以一
歲之所收納節年之舊欠民力實有未逮係屬

實在情形除上元江寧江浦六合四縣應帶嘉慶二十三年一年併道光六七年災緩初限銀米儀徵縣應帶道光四五兩年銀米寶應縣應帶南北鄉道光六年二限地漕銀兩熟田漕米銅山縣應帶道光二年地漕攤徵銀米豐縣應帶道光七年錢糧沛縣應帶泗一等九里道光五年初二限銀兩蕭縣應帶道光六年二限七年初限銀米並最遠之嘉慶二十四年銀兩碭山縣應帶崇教等十四里道光元年地漕五年初限地漕銀兩二限漕米二限護城堤三限王

平庄攤徵銀兩原奉里嘉慶二十四年地漕銀
兩二十五年漕米渠城里嘉慶二十五年地漕
銀兩道光元年漕米及各該里道光七年地漕
銀兩攤徵各款邳州應徵分徵案內最遠之道
光元年地漕攤徵錢糧睢寧縣應帶嘉慶二十
五年及道光六年初二限地漕攤徵銀米以上
各款均請仍行照常帶徵外合無仰懇

皇上天恩俯准將上元江寧二縣嘉慶二十四五年
及道光元二三四五等年未完積欠並六年災
緩二限錢糧江浦縣嘉慶二十五年及道光元

三四五等年災緩併六年災緩二限錢糧六合
縣嘉慶二十四年起至道光五年災緩積欠併
六年災緩二限銀米山陽縣嘉慶二十三四年
災緩併二十五年道光元年六年七年民欠錢
糧安東句容阜寧鹽城高郵泰州東臺江都甘
泉興化等十州縣嘉慶二十三年起至道光七
年止災熟地漕併攤徵河工出借籽種口糧各
款錢糧儀徵縣嘉慶二十三年二限及道光元
三六等年年初二限災緩銀米寶應縣東鄉道光
六七兩年及南北鄉道光七年熟田地漕銀米

銅山縣嘉慶二十三、四、五年及道光元、三、四、五、六、七等年未完民欠錢糧攤徵等款豐縣道光五、六兩年災熟錢糧道光三年併嘉慶二十五、六兩年出易豆石等款沛縣道光元、二、三、四、六、七等年併嘉慶二十三、四、五年及不在泗一等九里之道光五年未完舊欠錢漕出借倉糧攤徵河工等款蕭縣道光三、四、五等年民欠銀米攤徵等款碭山縣崇教等十四里嘉慶二十五年道光二年六年併五年二限地漕及三、四、六年初二、四限王平莊四、六年初三限護城堤攤徵銀

兩原奉里道光元二四五六等年地漕銀米併
嘉慶二十五年地漕銀兩渠城里道光元二年
地漕銀兩四五年地漕銀米及原奉渠城二
里道光二四五六等年屆限攤徵各款睢寧縣
嘉慶二十三四年及道光元三四五等年未完
民欠併攤徵水利各款邳州嘉慶二十三四五
年併道光二三四五六等年未完民欠銀米攤
徵等款概行緩至來年秋後分別啓徵以紓民
力淮安大河揚州徐州四衛隨同坐落州縣一
律辦理除飭查造應徵應緩款冊另行咨部外

所有熟田舊欠錢糧未能同時併納懇請緩徵
緣由謹合詞恭摺具

奏伏乞

皇上聖鑒訓示謹

奏

道光八年十一月二十三日具

奏十二月二十四日奉到

硃批另有旨欽此同日奉到道光八年十二月初九

日內閣奉

上諭蔣攸銛等奏查明江淮等屬熟田節年舊欠錢

糧請分別緩徵一摺本年江蘇省江寧等五府州
各屬成熟田地非係毘連災區卽屬連年積歉若
以一歲之所收完積年之舊欠民力實有未逮著
照所請除上元江寧江浦六合四縣應帶嘉慶二
十三年一年並道光六七年災緩初限銀米儀徵
縣應帶道光四五兩年銀米寶應縣應帶南北鄉
道光六年二限地漕銀兩熟田漕米銅山縣應帶
道光二年地漕攤徵銀米豐縣應帶道光七年錢
糧沛縣應帶泗一等九里道光五年初二限銀兩
蕭縣應帶道光六年二限七年初限銀米並最遠

之嘉慶二十四年銀兩陽山縣應帶崇教等十四里道光元年地漕五年初限地漕銀兩二限漕米二限護城堤三限王平莊攤徵銀兩原奉里嘉慶二十四年地漕銀兩二十五年漕米渠城里嘉慶二十五年地漕銀兩道光元年漕米及各該里道光七年地漕銀兩攤徵各款邳州應徵分徵案內最遠之道光元年地漕攤徵錢糧睢寧縣應帶嘉慶二十五年及道光六年初二限地漕攤徵銀米均照常帶徵外加恩准其將上元江寧二縣嘉慶二十四五年及道光元二三四五等年未完積欠

並六年災緩二限錢糧江浦縣嘉慶二十五年及
道光元三四五等年災緩並六年災緩二限錢糧
六合縣嘉慶二十四年起至道光五年災緩積欠
並六年災緩二限銀米山陽縣嘉慶二十三四年
災緩並二十五年道光元年六年七年民欠錢糧
安東句容阜寧鹽城高郵泰州東臺江都甘泉興
化等十州縣嘉慶二十三年起至道光七年止災
熟地漕並攤徵河工出借籽種口糧各款錢糧儀
徵縣嘉慶二十三年二限及道光元三六等年初
二限災緩銀米寶應縣東鄉道光六七兩年及南

北鄉道光七年熟田地漕銀米銅山縣嘉慶二十
三四五年及道光元三四五六七等年未完民欠
錢糧攤徵等款豐縣道光五六兩年災熟錢糧道
光三年並嘉慶二十五年出易豆石等款沛縣道
光元二三四六七等年並嘉慶二十三四五年及
不在泗一等九里之道光五年未完舊欠錢漕出
借倉糧攤徵河工等款蕭縣道光三四五等年民
欠銀米攤徵等款陽山縣崇教等十四里嘉慶二
十五年道光二年六年並五年二限地漕及三四
六年初二四限王平莊四六年初三限護城隄攤

徵銀兩原奉里道光元二四五六等年地漕銀米
並嘉慶二十五年地漕銀兩渠城里道光元二年
地漕銀兩四五年地漕銀米及原奉渠城二里
道光三四五六等年屆限攤徵各款唯寧縣嘉慶
二十三四年及道光元三四五等年未完民欠並
攤徵水利各款邳州嘉慶二十三四年並道光
二三四五六等年未完民欠銀米攤徵等款槩行
緩至來年秋後分別啓徵以紓民力淮安大河揚
州徐州四衛隨同坐落州縣一律辦理該部知道
欽此

請獎捐輸助賑及收養災民各紳商摺子

奏爲道光六年江淮等屬被水成災請將該境捐輸銀米及收養災民之各紳商懇

恩獎勵仰祈

聖鑒事竊照道光六年江寧淮安揚州徐州海州等府州屬被水成災仰蒙

聖恩賑恤蠲緩並奉

諭旨准撥畱南糶變及徵存緩漕各米石減價平糶災黎咸已共慶生全惟有例不給賑而口食拮据之貧民間賴紳士殷商樂捐助賑且有先期

避水及驟被水淹本籍不能存身散赴江寧蘇州等處求食由所在地方官收養安頓至次年春融始行資送回籍所需經費除率屬捐廉籌措應用外亦藉好義紳士捐貲接濟當經臣將籌辦收養事宜及勸捐緣由會同前督臣具奏欽奉

硃批朕正深廑注覽奏精詳周妥朕心稍慰務要隨時妥行督辦勉副朕痾瘝在抱之意有應奏者據實奏請可也欽此嗣於請敘辦賑人員摺內聲明樂輸各紳商飭司查明另行分別奏咨在案查

道光六年收養災民蘇松各屬收養最多爲時最久惟捐銀之人多係集腋而成已據蘇藩司造冊照例咨部請敘至江淮各屬其時卽係被災之處捐輸較難亦多勉力湊貲現據江藩司賀長齡查明造冊具詳請

奏前來臣覆核該司所屬上元江寧山陽阜寧鹽城高郵泰州東臺江都甘泉興化通州等一十二州縣冊報紳商男婦等通共捐銀一十二萬四百三十二兩零內除現任官員捐廉毋庸請獎並聲明不敢仰邀議敘紳士及三百兩以下

應由地方官給匾獎勵外其中有捐銀在一千兩以上者七名口三百兩以上者六十名口仍應請敘查該紳民等同在災區誼敦任恤體

聖主痾瘝之念切居鄰救助之心實堪嘉尙仰懇

皇上天恩敕部查照嘉慶十九年及道光三年四年

成案分別銀數酌加議敘俾資激勸并照例給

予部照除將各冊咨送吏部聽候核議請

旨遵行並咨明戶部外謹會同大學士兩江總督臣

蔣攸銛合詞恭摺具

奏伏乞

皇上聖鑒訓示謹

奏

道光八年十一月二十三具

奏十二月二十四日奉到

硃批吏部議奏欽此

籌勘回空漕船改由大江至丹徒橫閘試行入

口摺子

奏爲丹徒運河水淺潮枯回空船隻難行臣親往
籌勘改由大江至橫閘入口恭摺具

奏仰祈

聖鑒事竊照鎮江府屬丹徒運河自入冬後江潮微
弱兼以久晴風燥底水枯耗該處別無水源接

濟回空糧船淺阻難行經臣疊飭常鎮道鎮江

府丹徒縣設法幫撈催僨並將幫船所帶貨物

飭令起卸一面咨商漕臣先提浙船進口其松

江幫船或由橫越二閘行走或在壩外守候先行挑河臨時再行酌辦當將情形附片奏

聞在案嗣據該府縣先後稟報運河口外及瓜口未渡各幫尙有一千二百餘隻因京口內河水淺僅及數寸松江幫船俱停泊江邊浙省各幫離江口更遠亦難漫越行走其橫閘至江口雖亦間有淺處現已一律挑平約計大汛每日可進船六七十隻至越閘尙在橫閘以下七里進口之路較遠閘門亦狹而高可作民船分走之路惟幫船拘於成例多有遲疑觀望等情

臣隨於

十一月十六日自蘇起程帶同護理蘇松糧道
陳璽親至鎮江督同該府縣逐一查勘自京口
至甘露港三里甘露港至象山五里象山至橫
閘江口十二里沿江南岸均係蘆灘刻已全刈
多有緯道中間惟象山一處下係石腳不能上
緯不及一里風順一帆可過江船亦能帶行對
面卽係焦山冬令水淺並無急溜象山以下仍
是緯道直至橫閘船傍南岸行走惟東北風須
折戢其西南東南西北等風俱可順流而下南
岸帶緯並無險阻商民船隻往來不絕惟幫船

向未經過必須先爲試行臣當飭該府縣多備

熟諳江船引帶遴委文武員弁押送並經督臣

漕臣委員前來於十八日將松屬之興武八幫

船二十七隻興武七幫船一隻由京口開行是

日晚潮全行進開一路風恬浪靜行走平穩十

九二十日風色稍勁仍每日進船十餘隻復經

臣帶同該道將府縣等由江口乘船逆流而上

適新授浙江糧道宋其沅路過一同登焦山高

處觀看見北岸水平無石路亦可行遂將松白

幫船四十五隻由北岸用緯東行計自瓜洲大

口五里至佛紺洲又十里卽焦山北岸又五里
益課州轉南十里與橫閘江口對渡踰時卽至
是兩岸皆可行走如果風色平順潮水不致再
落則在後浙江各幫自可接續由閘進口總使
多進一船卽得一船之益以期趕緊歸次兌運
新漕用副來歲早抵禦壩之

欽限其已入京口淺阻之船尙有一百餘隻現飭該
府縣等設法催挽出淺刻日熬壩挑河併飭瓜
口京口至橫閘各委員相風督催勿稍支延外
臣因新漕緊急卽日回蘇辦事所有回空糧船

改由橫閘行走緣由謹會同大學士兩江總督
臣蔣攸銑漕運總督臣訥爾經額合詞恭摺具
奏伏乞

皇上聖鑒謹

奏

道光八年十一月二十三日具

奏十二月二十四日奉到

硃批知道了欽此

查明災區來春應請接濟摺子

總督會稿

奏爲遵

旨查明江省災區來春應請酌加接濟仰祈

聖鑒事案查承准軍機大臣字寄道光八年十月初

三日奉

上諭本年江蘇海州等州縣被災來春如有應須接濟之處查明據實覆奏等因欽此仰見

聖主軫念災黎有加無已

臣

等跪誦之餘莫名欽感

當卽恭錄轉行欽遵確查去後茲據江寧布政使賀長齡蘇州布政使梁章鉅查明各州縣衛

情形分別詳請核

奏前來伏查江蘇省本年被水成災及被水被旱
歉收各屬業經臣等奏奉

恩旨分別蠲緩給賑予以口糧凡屬災黎俱已共慶
生全無虞失所感沐

聖慈至優極渥茲復奉

特諭垂詢

臣

等細加體察除蘇藩司所屬間因雨水

愆期情形本輕均毋庸議外至淮揚等屬本年
秋被災歉內海州沐陽山陽清河桃源安東高
郵寶應沛縣等九州縣並淮安大河二衛業經

給予賑濟口糧但係積歉之區相距麥收尙遠
來春青黃不接之際民情不無拮据應須接濟
又今冬未經請給口糧之阜寧鹽城兩縣勘不
成災各區及宿遷縣仁二等三十三圖並沐陽
縣被五分災之伍鎮八保沛縣勘不成災之千
一等五里或積水未涸或素無儲備察看情形
來春亦須接濟相應恭懇

天恩將海州沐陽二州縣被八分七分災極次貧民
來春展賑一月山陽高郵寶應沛縣之成災五
分桃源縣之成災五分及勘不成災並清河安

東二縣勘不成災之情形較重各鄉莊乏食貧民均請

加賞一月口糧又阜寧鹽城二縣勘不成災各區及宿遷縣勘不成災之仁二等三十三圖沐陽縣被五分災之五鎮八保沛縣勘不成災之千一等五里乏食貧民應請

賞給一月口糧又淮安大河二衛坐落各縣飢軍同貧生兵屬隨同各該州縣一律查辦以資接濟而廣

皇仁其餘勘不成災歛收各屬統俟來春察看情形

如有無力佃農應須酌借籽種口糧及出易平糶之處臨時酌量查辦所有查明淮揚等屬被水災黎來春應須接濟緣由謹合詞恭摺覆奏伏乞

皇上聖鑒訓示謹

奏

道光八年十一月二十三日具

奏十二月二十四日奉到

硃批候旨施行欽此

奏請借款挑濬劉河摺子

總督會稿

奏爲籌議估濬劉河借糶緩漕米石攤徵還款仰
祈

聖鑒事竊照劉河卽古之婁江其上游自太湖東北
迤邐而來至新陽縣界之新造橋與吳淞分流
而東達太倉州城南歷鎮洋嘉定等界東入於
海綿長七八十里自嘉慶十七年挑浚之後屢
經水患沙泥淤墊旱澇無從灌洩不但太倉州
屬農田失收兼爲上游蘇松一帶水道之梗近
來淤墊更甚以致歲收屢歉

臣

陶澍前因公經

過該處日擊情形幾同平陸其出海之處有攔
門沙一道阻遏海口當論護理海關道陳鑾署
太倉州李正鼎逐細履勘或另籌入海之道並
於驗收吳淞工程案內會同臣蔣攸銑附片
奏明劉河等處工程應分年辦理在案查本年吳
淞江欽奉

諭旨疏挑夏秋間雨水雖多宣通迅速業已著有成
效若劉河不加疏浚設遇旱澇爲災附近民田
或淹或涸誠恐復議賑蠲於

國計民生均無裨益且浙省湖州所屬各縣濱湖

諸漕港業經該省奏辦興挑該處卽吳淞劉河
之上游將來挑通之後來源旣旺必須尾閘通
暢方能一氣貫輸茲據太倉州轉據地方紳士
呈請借

帑興辦當卽飭委蘇藩司梁章鉅上海道潘恭常
先後往勘均稱該處淤塞已甚爲目前急應興
辦之工查劉河關係各屬農田水利未便聽其
湮塞惟口門旣有攔沙必致旋挑旋淤自應相
度地形另改歸海去路俾水勢暢行一勞永逸
此次工程旣鉅經費孔多應須動用銀款必得

先爲籌備伏思地方要工原應民捐民辦惟蘇省自道光三年重災以後元氣未復民力拮据且工段綿長通盤籌計總須數十萬兩此時卽責成閭閻斷難先事鳩集而藩庫又無現款可籌據蘇藩司梁章鉅詳稱查得蘇松等屬道光八年有應行帶徵歷年緩漕正耗及七年冬間徵剩未完米款約計二十餘萬石應於歲內隨正漕帶徵派幫搭運今思本省水利要工難以再緩合無仰懇

皇上恩施准將此項米石畱蘇糴變卽借作挑浚劉

河之費仍俟工竣後按年分限攤徵還款一轉
移間於

國帑並無所虧而水利民生皆有實濟如蒙

俞允臣等再飭該司道等先將應辦工段方價確加
勘估臣陶澍並當親行履勘核實飭開工程銀
數清單縷晰入

奏一面飭蘇糧道確查徵完米數由蘇藩司查明
各屬時價酌中核定詳明飭糶提貯司庫以備
工需如有餘存仍行報撥倘或不敷另行籌款
奏辦所有劉河亟應挑浚及籌議借糶緩漕攤

徵歸款緣由謹合詞恭摺具

奏伏乞

皇上聖鑒訓示謹

奏

道光八年十二月十二日具

奏道光九年正月十三日奉到

硃批另有旨欽此又同日奉到道光八年十二月二

十七日內閣奉

上諭蔣攸銛等奏籌議估濬劉河借糶緩漕米石攤
徵一摺著戶部覈議具奏欽此

道光九年正月十九日准

兵部火票遞到

戶部咨籌議估濬劉河借糶緩漕米石攤徵還

款一摺

云

查該督等所奏係爲地方要務起

見自應隨時興辦惟漕糧乃

天庾正供八旗俸甲米石及京畿民食攸關倉儲支
放有常各省豐歉無定此項帶徵之糧卽係節
年正漕內少收之米並非額外多餘且該省均
係稔米此時出糶甚易將來籌補實難該省挑
浚劉河工程現在並未估有確數若遽將此項

米石准令變價糶漕米以辦河工既無辦過成案於京畿之倉儲民食均有關係所有此項緩漕米二十餘萬石仍令全行搭運赴通以實倉儲其挑浚劉河工程究竟需費若干應令該督等先行飭估確數所需銀兩另行籌款借用奏明辦理仍卽按限攤徵還款以歸核實是否有當謹恭摺覆

奏伏候

皇上聖鑒訓示謹

奏請

旨道光九年正月初十日奏本日奉

旨依議欽此

附奏回空漕船改由橫閘進口全竣摺片

再臣承准軍機大臣字寄道光八年十一月二

十四日奉

上諭前爾經額奏江廣各幫漫越浙江空船全出瓜
洲口並鎮江一帶船行水淺情形一摺現在節逾
冬至鎮江一帶水淺船行不能迅速該漕督擬照
陶澍咨會或改由橫閘進口南下或先行築壩挑
河俟開壩鋪水再行進口著卽相機妥爲辦理至
浙江幫船阻守壩外水手人等聚集一方必應巡
防彈壓著該漕督會同陶澍飭屬妥辦毋任再滋

事端等因欽此查入冬以來西風晴燥水落潮枯
回空軍船阻淺京口以內至豬婆灘一帶共計
一百四十餘艘寸步難移其未經入口掛江冒
險復有六百餘艘餘俱停泊瓜洲一帶水手人
等刻虞滋事經臣咨商督臣漕臣帶同護糧道
陳鑾親往籌催飭令鎮江府趙光祿丹徒縣吳
浚轉飭各幫船改由橫岡進口當將辦理情形
恭摺具

奏並以橫岡爲向來漕船屢議未行之路各幫不
免畏難勘得焦山南岸一道雖中間有象山石

腳里許船由中洪半帆可過其上下均係沙灘
可以帶緯又北岸自瓜洲至益課洲迤南並無
石腳更可用纜至橫閘江口對渡當卽派委護
鎮江營叅將金萬全等文武大小各員弁將停
泊大江金山鮎魚套一帶船隻分頭齎持令箭
催提其停泊江北瓜洲一帶船隻飭令京口水
師副將莊芳機會同揚州府江都縣等巡防彈
壓陸續押放出江一面飭令府縣多備帶江紅
船察看風色引帶各幫進閘復飭丹徒閘官每
日俟江船引帶幫船行抵橫閘江口卽催令出

江接引後船不許稍有停延茲據該道將府縣等稟報自十一月十八日起至十二月初九日將江浙幫船一千一百三十六隻由大江催進丹徒橫閘掃數啣尾南下一無疎失等情其京口內河膠淺之船亦經催送出淺南下查橫閘以內水路寬展此後毫無阻滯惟恐進閘幫船又復任意停泊現又飭令護叅將金萬全及臣標千總劉燦等尾償迎提以期迅速歸次兌運新漕謹遵來歲四月初十日早抵禦壩之

欽限仰副

宸厪再查回空幫船歷因京口冬底潮枯淺滯或車
水灌塘或築壩鬲撈或截留江外遲至春間開
壩始得回歸自嘉慶九年至道光四年屢議由
橫閘行走皆以江路險阻爲辭甚至船已試行
仍復截回此次經臣親往籌勘並經督臣漕臣
委員前來督同文武將幫船一千一百餘號於
二十日間連檣安穩過渡於漕運頓開捷徑不
特回空迅速可免糧船水手聚集滋事兼得騰
空趕辦挑河於新運事宜大有利益所有鎮江
府丹徒縣及文武各委員實係分外出力與常

年催餉糧船迥不相同自應酌加鼓勵容俟查明尤爲出力之員會同督臣漕臣另行奏請獎敘合并陳明謹

奏

道光八年十二月十二日具

奏道光九年正月十三日奉到

硃批所辦甚好前此朕亦懸念此舉曾經面詢額騰伊據云橫聞甚可行走可保無虞該府縣及文武等自應量加鼓勵奏到時再降諭旨毋許冒濫欽此

御賜福字暨麕肉鹿腿謝

恩摺子

奏爲恭謝

天恩事道光八年十二月二十四日摺弁回蘇齋奉

御書福字暨麕鹿等肉

頒賞到臣謹卽恭設香案望

闕叩頭祇領欽惟我

皇上洪疇錫五

泰運開三

龍章紀定遠之勛光昭

義畫

螭陛賜慶成之宴

德備

堯廚

受祿宜人共頌

九重戩穀

推恩逮下方臚萬國歡心

微臣幸沐

均視欽承

嘉貺

奎文景耀春生垂露之書瑞脯香分

恩湛同民之固仰金題而就

日倍切丹忱調玉鼎以宣和彌慚素食際此登臺樂
凱聽康衢鼓腹之歌還應夾轂行春溥

聖世同文之化所有臣感激下忱謹繕摺恭謝

天恩伏祈

皇上聖鑒謹

奏

道光八年十二月二十六日具

奏九年二月初一日奉到

硃批知道了欽此

耆紳潘奕雋會榜重逢請與

恩榮筵宴摺子

總督會稿

奏爲耆紳會榜重逢請與

恩榮筵宴以光盛典仰祈

聖鑒事據江蘇布政使梁章鉅詳稱吳縣耆紳潘奕雋現年八十九歲於乾隆三十四年己丑科會試中式進士由內閣中書協辦侍讀典試貴州陞任戶部貴州司主事嘉慶元年恭遇

覃恩以子世璜官

封翰林院編修二十五年以子世璜戶部主事加三級

請四品

封典道光二年壬午科重赴鹿鳴宴經前撫

臣魏元煜

奏奉

上諭江蘇原任戶部主事潘奕雋年逾八秩再遇鄉
科著加恩賞給員外郎銜以示朕嘉惠耆儒至意
欽此在案茲屆來年己丑科會榜重逢請與

恩榮筵宴由縣府查明具詳請

奏前來

臣

等查潘奕雋志奮丁年名題甲榜班分

浴鳳曾持繡嶺之文衡秩晉祝鳩復荷木天之
寵誥疏廣清以養素宗親則令範交師伏生老尚談

經子姪則巍科繼起越廿八榜而簪花遠溯共
羨靈光植體之堅躋九十歲而瀛島重登益昭
壽考作人之盛前者萃筌載詠已邀紫紱之

恩施今茲杏蔭重輝請與紅綾之寵宴除咨明禮部
外謹合詞恭摺具

奏伏乞

皇上聖鑒謹

奏

道光八年十二月二十六日具

奏九年二月初一日奉到

硃批另有旨欽此同日奉到道光九年正月十三日

內閣奉

上諭蔣攸銛等奏耆紳重與恩榮宴一摺江蘇原任
戶部主事潘奕雋年躋九秩前於壬午科重遇鹿
鳴賞給員外郎銜茲值己丑科會試蒞榜重逢洵
屬藝林盛事著加恩賞加四品卿銜准其重赴恩
榮筵宴以示朕嘉惠耆儒至意欽此